

❖ MESEIA'R NADOLIG

*Ac wedi geni'r Iesu ym Methlehem Jwdea, yn nyddiau  
Herod frenin, wele, doethion a ddaethant o'r dwyrain i  
Jerwsalem, gan ddywedyd, Pa le y mae'r hwn a anwyd yn  
Frenin yr Iddewon? canys gwelsom ei seren ef yn y dwyrain,  
a daethom i'w addoli ef.*

(Mathew 2:1-2) (BWM)

Trwy sioe bapur sidan amryliw y llan,  
A gwreichion y tinsel ar daen ym mhob man,  
Feseia'r Nadolig, Oleuni y Byd,  
Tywynned y Seren i'n dallu i gyd.

O'r farchnad frasterog lawn ffwndwr, lawn blys,  
Â'r gwerthwr teganau bargeiniwn mewn brys,  
Feseia'r Nadolig, rho daw ar y ffair,  
A dangos y Trysor a aned o Fair.

Os crac sy'n y clychau, os brau ydyw'r rhaff,  
Mae metel ein bomiau Cristnogol yn saff;  
Feseia'r Nadolig, cyn ffrwydro'r holl fyd,  
Rho inni'r Tangnefedd sy'n gariad i gyd.

**Robin Williams**